

## **Miu memm**

Mu memmel om pehme põse,  
tüüst kare ja soonitse käe.  
Memme sülen mu ase,  
kennigi sääl mu ei näe.

Memmel om sinitse silmä,  
valge ja all temä juuss.  
Memme man lämme om ilma,  
ei putugi maailmas muus.

Memmel om tönksi jala  
ja pähän läigive relli.  
Ei olegi parembet vaja-  
Ta sedäsi omgi meil kallis.

## **Miu taat**

Miu taat ei käi küll tüül,  
a tegemist tal pallu.  
Käe tal käive päe kui üü-  
tüüd rohkemb om ku rammu.

Tal ei ole koskil igäv,  
iki aiga vähä,  
vaevald lõunatunni pidä-  
uus mõte joba pähän.

Miu taadil ei ole mobiili,  
arvutit, i-Podi kah.  
Kähen üttelugu tal viili,  
ruvikäändja, näpitse kah.

*Kristi Ilves*